

QVÆSTIO MEDICA.

QVOD LIBETARIIS DISPVATIONIBVS MANE DISCVTIENDA

IN SCHOLIS MEDICORVM, DIE IOVIS XIX. IANVARII,

M. ROBERTO PATIN, Doctore Medico, moderatore.

An fortes creantur fortibus?

1002

RERM quæ huius mundi ambitu continentur, nulla non id agit, vt seipsam conseruet, eademque perpetuo maneat. Quemadmodum autem pulcherrimæ & summæ diuinæ rationis præ cæteris diuinitatis suæ speci-
men obtinent, vt sapientia naturæ nulli affectioni subiecta, sempiterna sint & immutabiles, sic quæcumque mortali conditione genitæ ab ea perfectione abfunt, eò continenter aspirant, vt quoniam penes substantiam sin-
gularem stare semper nequeunt, specie saltem persistant. Hoc porro solâ assequuntur generatione, cunctis viuentibus eo fine à Natura tributa, vt suum in locum reponant aliquid sibi simillimum, impendentemque
ceu saxum Tantalò, mortis necessitatem leniant, viua sui relicta imagine. Scilicet quo nobilior est, & à scopo minus aberrat vnumquodque generans; hoc se in genito plenius repræsentat & exprimit. Propterea, qui
solus intra se perfectissimè generat Pater Diuinus, suam ipsam numero planè eandem naturam impertit Filio, à quo alius est sola ratione personæ, quâ non potuit non distingui. Res creata quia ad excellentem illum generandi
modum non valent asurgere, ideo solum specie cum re producta conueniunt: sic homo hominem, leonem leo, oleam procreat olea. Ab hac lege ne tunc quidem receditur, cum præpostero alienoque complexu iun-
guntur diuersi ordinis animalia.

NEC verò in omni viuentium propagatione speciei duntaxat seruanda studet Natura: sed etiam proli omni pacto procreatoribus assimilanda, cum sit alioqui diuersitatis amantissima: hæc eius operum ac votorum summa
est, ad quam & contendit perpetuò, & peruenit sapissime; in ijs præsertim quæ vel ob mistas maris & femina vires, ex seipsis progignunt, nullo alterius congressu, vel sexu distincta, nullo *varietatis* motu distrahuntur
ab his quibus intendunt naturæ sacris. Quis enim, nisi fortè Deliacus aliquis gallinarius vsu doctus, ouum ab ovo discernere, in plantarum genere fruticem à frutice, lactucamve à lactuca, è qua orta est, aut in bruta-
rum animantium familia partum adustum facillè internoscit ab ijs, à quibus olim spiritum duxit? Homo ipse qui maiori fingitur apparatu & studio, hac eadem conditione nascitur: & nisi parentes corporis molè, colore, ha-
bitu, oris & vultus specie referat, ac demum ab ijs plerosque status & motus effingat, quodammodo monstrum est, & inchoatum opus naturæ labentis, siue illius facultatis ignauia, cuius est aptè tornare corpus, siue minùs
tractabilis, nec ad omnia flexibilis materiæ vitio, vel nauius ipsos, & si quod illorum corporibus inest singulare signum, fecus reddit sibi inuicta velut domestica & gentilitia quædam insignia: nempe sic tota in eo est, vt quasi
leuius peccatura, infelicem, aut etiam nullam edere malit, quàm dissimilem parentibus sobolem.

QUID moror? Nequidem satis est similem tibi se vel corpore tantum, vel vultu dederit, morum quoque filius sit oportet, in quo te totum tanquam renouatum ac denuò victurum contemplaris, cuius commodis magis
studes, quam tuis. Non possunt profectò mores certius, quàm stirpis genere pendere: vix quidquam enim habemus virtutis aut vitij, quod non traxerimus à parentibus: qui tametsi suum nobis non commodari animum;
ad nos tamen transmississe videntur, quia instrumenta omnia quibus vitur, & citra quæ omnino nihil agat, nobis suppeditauerunt. Quippe delibatus è singulis corporis partibus humor ille seminalis, qui parentis vtriusque
quasi compendium est, & quidem animatum, vbi diuinâ comprehensus fauilla hæsit in vitam, adeo secum minimè mendax earum omnium importat exemplar; vt formetur in hominem pendè eundem temperie & effigie.
Hinc cum diuerse in corporibus propensiones, & diuersi cuiusque impetus ac studia ab humorum, partium, & temperiei diuersitate sobolescant; quali corporis, animique valetudine parentes fuerint, tales ab his expecta li-
beros, putà biliosum ex bilioso, melancholicum à melancholico, à prudenti prudentem, à fatuo fatuum, à calculoso calculosum, sicque phthysicum, epilepticum, podagricum à parentibus pari labe contaminatis.

NVNQVID verò suos habent Heroas casæ? Nonne quosdam nobiles non accepit, sed sua fecit virtus? & contrà multis longo sanguine censu Heroibus, sua fuit dedecori proles? Ita quidem aliquando fit, sed nullâ natu-
ræ culpa. Mira omnino vis est ingenta à principiis, insuntque semini quædam semina ac velut elementa morum, quæ nisi multa se aliunde opponant, paria his ex quibus orta sunt, facient. Sed velut translata tenerior planta cælo
soloque mutato, nonnihil mutat ingenium: sic quia multa sunt à quibus assiduò nostra temperamenta peccuntur, cum ad rem pertineat, quâ quisque cæli temperatione, quomodo affectis compositisque sideribus, quibus in
terrâ plagis locisque viuatur, quàm incommodis commodisque ventis, cibis, aquis vtatur, interdum & bona indoles ab his omnibus, aut etiam praua consuetudine, nimia magistrorum indulgentiâ, ignauia luxuriaque corrumpi-
tur; & qui naris obesa, disijque aduersis genitus aliquid ab ortu deprauatum habere videbatur, scitè sublati idonea exercitatione vitij, aduocataque conuenienti temperie, sibi primum obstruam gloriæ virtutisque
viam citius quouis alio emittitur. Hac ratione nonnumquam in eodem Socrate, duplex est Socrates. Ferè tamen ad mores natura recurrit priuatos, fixa & mutari nescia; & vt multa extent quæ corporis animique vim insitam
acuant ac promoucant, multa quæ obdunt; numquam non interlucet aliquid, vnde facillè æstimes, quò quisque sponte sua, & ex natia inclinatione propendat. Quid ergo doctrina proficit? vt politiora, non vt meliora
siant ingenia: solida namque virtus nascitur magis, quam fingitur, ipsamque adeo nemo sine indole colet, aut litabit gloriæ.

OPTIME igitur ad procreandos liberos comparati sunt fortes illi & altioris sensus homines, qui summotis vitiis omnium turbidis motibus, nec metu debilitati, nec impotenti vilo temeritatis incurfu transuersi agun-
turi sed moderationis consilijque beneficio inter res secundas & aduersas, eâ sunt firmitate mentis, quæ sanæ rationis modum numquam signat expugnari: corpore autem sic vtuntur & valent, vt & cibo non plus indulgeant,
quam ipsi sustinendo sit opus, & Veneris vsum intra coniugum caritatem, suscipiendæque proli necessitatem, clausum teneant. Qui tam iustum in omnibus rebus temperamentum adhibere norunt, quis neget beatos? Ve-
rum longe feliciores liberos, quorum pectoribus præstans ille corporis animique vigor, ac cæteri paternarum virtutum numeri, nullo vocis ministerio, nullo litterarum vsu, tacitis viribus cum ipso spiritu infunduntur.
Haud dubiè quæ vitam ab his est orta principiis, cum se matura leuabit progenies, cum sanctam sine labe domum, vitioque carentem viderit, atque adeo ipsam exempla domestica magnis auctoribus animum subitura
confirmarint; non potest non florere quibuslibet bonis, hautaque à progenitoribus eorum semina, in tam vberis honestatis, constantiæ, atque integritatis fruges effundere: vt è sapientiæ stirpe creatam dicas. Atque his
tam faustis auspicijs propagata soboles efficit, vt & genuisse iuuet, & generare libeat.

Ergo fortes creantur fortibus.

Proponebat Lutetiæ CAROLVS BARALIS, Parisinus, A. R. S. H. M. DC. LI.

DOMINI DOCTORES DISPVATVRI.

M. Ioannes Garbe.
M. Paulus Courtois, Censor Schol.
M. Petrus Moriau.

M. Guillelmus Petit.
M. Ioannes le Preuost.
M. Ioannes Cousin.

M. Petrus de Beaurains.
M. Robertus Tulioie.
M. Dionysius le Soubs.

